

## “ТАСДИҚЛАЙМАН”

Муҳаммад ал-Хоразмий номидаги  
Тошкент ахборот технологиялари  
университети ректори

\_\_\_\_\_ Т. Тешабаев

“ \_\_\_\_\_ ” “ \_\_\_\_\_ ” 2017 йил

### МУҲАММАД АЛ-ХОРАЗМИЙ НОМИДАГИ ТОШКЕНТ АХБОРОТ ТЕХНОЛОГИЯЛАРИ УНИВЕРСИТЕТИНИНГ «ТАЛАБАЛАР ТУРАР ЖОЙИ» ТЎҒРИСИДАГИ НИЗОМИ

#### I. Умумий қоидалар

1. Мазкур низом Тошкент ахборот технологиялари университети (кейинги ўринларда матнда университет деб юритилади) Талабалар турар жойи, уни ташкил қилиш, фаолият кўрсатиши, мавжуд тартиб-қоидалар, маънавий-маърифий ишларни тизимли ташкил қилиш тартибини белгилайди.

2. Университетга узоқ шаҳар ва вилоятлардан келиб таълим олаётган талабаларни вақтинча яшаш жойи билан таъминлаш мақсадида «Талабалар турар жойи» ташкил этилади.

3. Талабалар турар жойи бошқаруви – мазкур Низом асосида университет раҳбарияти томонидан шакллантирилади ҳамда ўз фаолияти йўналишига, иш режаси ва дастурига, махсус муҳрига, штат бирлигига эга бўлиб, Талабалар турар жойининг маъмурий, хўжалик, маънавий-ахлоқий тарбия ишларини бошқаради.

4. Талабалар турар жойида талабаларнинг яшаши, ўз устида мустақил ишлаши, дам олиши ҳамда спорт, санъат ва бошқа клубларда қатнашиши учун шароитлар яратилади.

5. Талабалар турар жойининг моддий-техник таъминоти, уни капитал ва жорий таъмирлаш, бинодаги қаттиқ ва юмшоқ кроват, мебель, хона жиҳозлари (*кўрна-тўшак, ётинчиқлар, сочиқлар ва бошқалар*), техника воситаларини сақлаш, таъмирлаш, ҳудудни ободонлаштириш, тозалигини таъминлаш, коммунал-хўжалик хизматлари (*иссиқ ва совуқ сув таъминоти, канализация, иссиқ сув қувурларини таъмирлаш*) ва бошқа шарт-шароитлар университет томонидан таъминланади.

6. Талабалар турар жойи олиш учун факультет декани ёки маънавий-ахлоқий тарбия ишлари бўйича проректор номига ариза ёзади ва унга паспорт нусхасини илова қилади. Мазкур ариза ўрнатилган тартибда кўриб чиқилгач, талабалар турар жойларига жойлаштириш бўйича маънавий-маърифий ишлар бўйича проректор, декан, Ўзбекистон ёшлар иттифоқи университет бошланғич ташкилоти ва касаба уюшмаси руҳсати билан берилган ордер асосида амалга оширилади.

7. Талабалар турар жойларида истиқомат қилувчи талаба ва магистрлар Ўзбекистон Республикаси Ички ишлар вазирлиги томонидан таъсис этилган қоидалар асосида вақтинча рўйхатга олинадилар. Рўйхатга олиш ишлари паспортист(ка) томонидан амалга оширилади.

8. Тарбиявий-маданий, спорт-соғломлаштириш ишлари ва Талабалар турар жойида яшовчиларга маиший хизмат кўрсатишни ташкил этиш борасидаги умумий раҳбарлик университет ректори зиммасига юклатилади.

9. Талабалар турар жойларига университет ишчи-хизматчилари, бегоналар, ўқувчи ҳамда талаба ва магистрларнинг оила аъзоларини жойлаштириш қатъиян ман этилади.

10. Талабалар турар жойларида яшаш учун тўлов миқдори университет кенгаши қарори ёки университет буйруғи билан белгиланади.

## **II. Талабалар турар жойида яшовчиларнинг ҳуқуқ ва мажбуриятлари**

11. Талабалар турар жойида яшовчиларнинг ҳуқуқлари қуйидагилардан иборат:

- ўзига ажратилган хонада ўрнатилган ички тартиб-қоидаларга риоя қилган ҳолда яшаш;

- Талабалар турар жойи биноларидаги маданий-маиший жиҳозлардан фойдаланиш;

- фойдаланиш учун яроқсиз ҳолга келган жиҳоз, мебель ва бошқа мулкларни таъмирлаш, янгилаш ҳамда маиший хизматлардан фойдаланишда юзага келган камчиликларни бартараф этишни сўраб раҳбариятга мурожаат қилиш;

- Талабалар турар жойларида ўтказиладиган оммавий маданий, спорт ва тарбиявий тадбирларда иштирок этиш;

- яратилган шарт-шароитлар бўйича университет маъмуриятига таклифлар билан чиқиш;

- «Талабалар кенгаши»нинг аъзоларини сайлаш ва унга сайланиш;

- «Талабалар кенгаши» орқали Талабалар турар жойининг маиший таъминотини такомиллаштириш, тарбиявий ишлар ва маданий ҳордиқни ташкил этиш, яшаш хоналарини жиҳозлаш бўйича масалаларни ҳал этишда иштирок этиш.

12. Талабалар турар жойида яшовчиларга қуйидаги мажбуриятлар юкланади:

- ички тартиб-қоидаларга қатъий амал қилиш;

- маъмурият билан тузилган ўзаро масъулият тўғрисидаги шартнома қоидаларига риоя қилиш;

- навбатчилик жадвалига биноан хоналарда, қават ва кириш жойларида навбатчилик қилиш, дам олиш жойларида намунали тозаликни таъминлаш;

- газ ва электр асбобларидан унумли фойдаланиш ва техника хавфсизлиги қоидаларига риоя қилиш;

- яшаб турган хона ва умумий фойдаланиш жойларини ҳар доим саранжом тутиш;

- хонадошлар ҳамда Талабалар турар жойида яшаётган талаба ёки ўқувчилар билан самимий ва аҳил муносабатда бўлиш;

- қават ва секция сардорлари, Талабалар кенгаши раиси топшириқларини бажариш;

- Талабалар турар жойи ва хонадаги мавжуд ҳамма жиҳозларни (*шифонер, кроват, тумбочка, стол, стул ва ҳ.к.*) намунали даражада тутиш;

- Талабалар турар жойи ва хонадаги мебелларни, дераза ва унга қўйилган ойналарни синдирмаслик, эшик кулфларини Талабалар турар жойи комендантининг рухсатсиз алмаштирмаслик;

- умумий фойдаланиш жойларига ўрнатилган ёриткичлар, электр ва газ плиталарини эҳтиёт қилиш, ювиниш хонаси, ошхона ҳамда маънавият ва маърифат хоналари жиҳозларидан тўғри фойдаланиш;

- электр ва газ плиталаридан тежаб фойдаланиш, қўлбола электр иситкич асбобларидан фойдаланмаслик;

- жадвал бўйича навбатчилик қилиш, белгиланган муддатда қаватни ҳамда умумий фойдаланиш жойларини (*ҳожатхона, ювиниш хоналари, овқат тишириш хонаси ва бошқалар*) тозалаш, маиший чиқиндиларни махсус белгиланган жойларга ўз вақтида чиқариб ташлаш;

- Талабалар турар жойида ўтказиладиган ҳашар, кўкаламзорлаштириш ва ободонлаштириш ишларида мунтазам, фаол қатнашиш;

- Талабалар турар жойидан узок муддатга кетишдан олдин (*ёзги ва қишки таътилга, дам олишга, амалиётга*) хонадаги жиҳозлар ва хона калитини Талабалар турар жойи комендантига топшириш.

- битирув малакавий ишларини тугаллагандан сўнг ёки университетдан четлаштириш тўғрисида буйруқ чиқарилган тақдирда хона ва ундаги жиҳозларни бир ҳафта муддат ичида Талабалар турар жойи бошқаруви раиси (мудир)га топшириш.

13. Талабалар турар жойида яшовчиларга қуйидагилар ман этилади:

- Талабалар турар жойи комендантининг рухсатсиз бир хонадан иккинчи хонага кўчиб ўтиш;

- яшаш хонасида кир ювиш;

- хонадаги анжомларни бошқа хонага рухсатсиз кўчириш;

- хонадаги электр тармоқларини ўз хоҳишича ўзгартириш ва қўшимча ёриткич ўрнатиш;

- деворларга турли расмлар чизиш, ҳар хил қоғозлар ёпиштириш;

- овоз чиқарувчи қурилмалар овозини хона ташқарисидан юқори эшитилиши, юқори овозда ашула айтиш ва мусиқа асбобларини чалиш;

- электр иситкичлар ва керосиндан фойдаланиб ишлайдиган асбобларни ишлатиш;

- бегона одамга тунаб қолиш учун жой бериш;

- спиртли ичимликлар ва гиёҳванд моддаларни истеъмол қилиш, сақлаш, сотиш таъқиқланади.

14. Талабалар турар жойи ҳаётида фаол иштирок этаётган, намунавий хулқли талаба ёки ўқувчилар қуйидаги тартибда рағбатлантириладилар:

- миннатдорчилик билдирилади;

- мақтов ёрлиғи;
- эсдалиқ совғалари билан тақдирланади;
- моддий рағбатлантирилади.

15. Талабалар турар жойи ички тартиб-қоидаларини бузганларга нисбатан қуйидаги чоралар қўлланилади:

- огоҳлантирилади;
- талабанинг ота-онаси билан суҳбат ўтказилади;
- ҳайфсан эълон қилинади;
- Талабалар турар жойидан чиқарилади;
- университет ректорига талабалар сафидан чиқариш бўйича таклиф киритилади;

- талабалар ўз турар жойларида фойдаланиб келаётган мол-мулкка бевосита етказилган ҳақиқий зарарни, агар зарар уни бартараф этиш мумкин бўлмаган кучлар, нореал хўжалиқ таваккалчилиги оқибатида, охириги зарурат ёки зарурий мудофаа натижасида келиб чиққан бўлмаса тўлаши шарт.

### **III. Университет маъмуриятининг мажбуриятлари**

16. Ректор, проректорлар, деканлар, комендантлар Талабалар турар жойи тозалиғи, санитария ҳолати, Талабалар турар жойида яшовчиларнинг дахлсизлиғи ва тарбиявий ишлар самарадорлиғи учун масъулдирлар.

17. Университет маъмуриятининг мажбуриятлари:

- Талабалар турар жойида санитария ва гигиена қоидаларига риоя этилишини таъминлаш;
- Талабалар турар жойини тегишли чойшаб, ёстиқ жилдлари ва бошқа зарур анжомлар билан таъминлаш;
- Талабалар турар жойида ўтказиладиган тадбирлар, маданий-оммавий ишлар ҳамда спорт мусобақаларини ўтказишни таъминлаш;
- Талабалар турар жойини жорий таъмирлаш ишларини амалга ошириш;
- Талабалар турар жойида яшаш шароитларини тегишли меъёрлар асосида жиҳозлар билан таъминлаш;
- Талабалар турар жойида фаолият юритувчи шахсларни зарурий иш ўринлари билан таъминлаш;
- Талабалар турар жойида юзага келган маиший хизмат тизимидаги камчиликларни ўз вақтида бартараф этиш ва қайта туғилмаслигининг олдини олишдан иборат.

18. Университет маъмурияти ҳар бир Талабалар турар жойига алоҳида масъул этиб, Талабалар турар жойлари Бошқарув раиси (мудир)ни тайинлайди.

### **IV. Талабалар турар жойи фаолиятини ва бошқарувини ташкил этиш**

19. Талабалар турар жойининг ўрнатилган меъёрий талаблар асосида фаолият юритиши учун шахсан ректор (директор) масъулдир.

20. Талабалар турар жойида ўқув зали, маънавий ва маърифат хонаси, дам олиш (ота-оналар) хонаси, гигиена хонаси, тарбиячилар хонаси, ошхона, ҳожатхона, ювиниш хонаси, душ ташкил этилиши лозим.

21. Талабалар турар жойида кутубхона филиали ташкил этилади ва режа асосида ўз фаолиятини олиб боради.

22. Талабалар турар жойидаги ошхоналар газ ёки электр плиталари, стол-стул, сув тармоғи, санитария жиҳозлари билан таъминланиши ҳамда ёнғин хавфсизлиги талабларига тўлиқ жавоб бериши шарт.

23. Талабалар турар жойидан фойдаланиш, меъёрий-ахлоқий тартибларга риоя қилинишини таъминлаш, талаба ва ўқувчиларга қулай шароитни яратиш мақсадида Талабалар турар жойи Бошқаруви ташкил этилади. Бошқарув таркиби ва хизмат кўрсатувчи ходимлар университет штат бирликлари доирасида шакллантирилади. Намунавий штат бирлигида кўзда тутилмаган ходимлар жамоатчилик асосида ишга жалб этилади. Унинг таркиби қуйидагилардан иборат бўлади:

- бошлиқ (мудир);
- хўжалик ишлари бўйича мудир муовини - (Бошлиқ ўринбосари);
- Талабалар Кенгаши раиси (Бошлиқ ўринбосари);
- педагог-тарбиячилар ва бошқалар.

24. Талабалар турар жойи Бошқарувини ташкил этиш, олиб борилаётган ишларни мувофиқлаштириш ва назорат қилиш масъулияти ректор (директор) зиммасига юклатилади.

25. Талабалар турар жойи бошқарувининг штатлар бирлигини таъминлаш, иш ҳақини белгилаш, ходимларни ишга жалб этиш, улар томонидан ўз хизмат вазифаларининг бажарилишини назорат қилиш, Талабалар учун зарур шарт-шароитларни яратиш бериш ва ижтимоий ҳимоя қилиш ҳамда истиқомат қилувчи Талабалар ўртасида ташкилий, хўжалик, ҳуқуқий-тарбиявий ишларни олиб бориш масъулияти тегишли проректорлар (директор ўринбосарлари) томонидан амалга оширилади.

26. Талабалар турар жойи бошқаруви таркибидаги барча ходимлар ректор (директор) томонидан тайинланади. Бошқарувнинг йиллик иш режаси университетда Илмий кенгаш томонидан тасдиқланади ва ҳар ярим йилда ўз фаолияти бўйича Илмий кенгашга ҳисобот беради.

**Эслатма:** Талабалар турар жойлари жойлашиши яқин бўлиб, уларда яшовчилар сони бир минг ва ундан ортиқ бўлса «Талабалар шаҳарчаси» дирекцияси ташкил этилиши мумкин. Унинг фаолияти университетга ажратилган маблағлар ва бюджетдан ташқари маблағлар ҳисобидан қопланади.

## **V. Талабалар турар жойи бошқаруви раиси (мудир)нинг вазифалари**

27. Бошқарув раиси – Талабалар турар жойи фаолиятини ташкил этишнинг барча йўналишлари бўйича умумий рағбарликни олиб боради.

28. Бошқарув раиси лавозимига тайинланадиган шахс тажрибали бўлиши шарт.

Унинг вазифалари қуйидагилардан иборат:

- Талабалар турар жойининг фаолиятини ташкил этиш дастури ва режасини ишлаб чиқади;

- жорий йилда олиб борган фаолияти бўйича ҳар ярим йилда университет Илмий кенгаши ҳисобот беради;

- Талабалар турар жойи бошқарувидаги лавозимларга штат бирликлари асосида ходимлар ва ишчиларни танлайди, ишга қабул қилиш ва ишдан озод этиш бўйича ўз тавсияларини раҳбариятга расмийлаштириш учун тақдим этади;

- талабаларни хоналарга жойлаштиради;

- санитария меъёрларининг бажарилишини таъминлайди;

- ўринларни талабанинг жинси, факультетлар бўйича тақсимотини белгилайди, улар ҳақидаги умумий маълумотлар банки, ахборотлар, статистик жадвалларни тайёрлайди, ушбу маълумотлар билан университет раҳбарларини доимо хабардор этиб туради;

- Талабалар турар жойининг моддий-техник таъминотини таҳлил этади, эҳтиёж ва талаблар асосида зарур материаллар, жиҳозлар учун буюртмалар беради;

- талабаларнинг яшаши, дарс тайёрлаши ва дам олишлари учун зарур шарт-шароитлар яратади;

- паспорт тизими, Талабалар турар жойига кириб-чиқиш қоидаларининг қатъий бажарилишини таъминлайди;

- педагог-тарбиячилар фаолиятини ташкил этади;

- доимий навбатчиликнинг узлуксизлигини таъминлайди;

- ҳафталик йиғилишлар, тадбирларда иштирок этади, Талабалар турар жойига тегишли бўлган масалалар бўйича ҳуқуқ-тартибот органлари, ташкилотлар, муассасалар билан ҳамкорликда иш олиб боради;

- назоратчилар гуруҳи фаолиятини ташкиллаштиради ҳамда «Маҳалла посбонлари», «Ёш посбонлар» билан ҳамкорликда ишлашни таъминлайди;

- Талабалар бўш вақтини фойдали меҳнат билан тўлдиришни амалга оширади.

## **VI. Хўжалик ишлари бўйича мудирнинг вазифалари**

29. Хўжалик ишлари бўйича мудир фаолиятини бевосита бошқарув раиси (мудир) йўналтиради, мувофиқлаштиради ва назорат қилади.

30. Хўжалик ишлари бўйича мудир лавозимига тайинланадиган шахс олий маълумотли ва камида 3 йиллик иш стажига эга бўлиши лозим.

31. Унинг вазифалари қуйидагилардан иборат:

- Талабалар турар жойи ва унинг ҳудудидаги хўжалик ишларини олиб боради;

- талабаларни зарур бўлган қаттиқ ва юмшоқ мебеллар, хона жиҳозлари, ювиниш воситалари билан таъминлайди;

- мавжуд хўжалик муаммолари ва камчиликларни бошқарув раиси билан биргаликда бартараф этади;

- Талабалар турар жойи ҳудудини ободонлаштириш, кўкаламзорлаштириш, санитария ишларини амалга оширади;

- Талабалар турар жойининг совуқ ва иссиқ сув, газ ва электр энергияси билан таъминланишини назорат қилади, юзага келган муаммолар бўйича тегишли ташкилотлари билан боғланади, камчиликларни бартараф этади;
- хона жиҳозлари (*чойшаблар, ёстиқ жилди, кўрна-тўшак, сочиқлар*)ни даврий равишда алмаштирилишини амалга оширади;
- тегишли худуддаги экология, атроф-муҳит тозалиги, дарахтларни парваришлаш, кўкаламзорлаштириш ишларини олиб боради;
- тегишли худуддаги электр тармоқлари, ёритгичлар ишлашини таъминлайди;
- хавфсизлик ва ёнғин хавфсизлигига оид ишларни амалга оширади;
- санитар хоналар (гигиена хонаси, душ, хожатхона) фаолиятини назорат қилади;
- хўжалик соҳасида хизмат қилувчи техник ходимлар - фаррош, вахтёр, электрик, сантехник, боғбон ва бошқаларнинг фаолиятини ташкил этади, назорат қилади.

## **VII. Педагог-тарбиячи фаолиятини ташкил этиш**

32. Педагог-тарбиячи университет ректори буйруғи асосида Талабалар турар жойи бошқарувига жалб этилади.

33. Педагог-тарбиячи вазифасига жалб этиладиган шахс олий педагогик маълумотли ва камида 3 йиллик иш стажига эга бўлиши лозим.

34. Педагог-тарбиячи маънавий-ахлоқий тарбия самарадорлиги учун масъулдир. Педагог-тарбиячиларнинг иш вақти смена асосида ташкил этилади.

35. Педагог-тарбиячиларнинг иш режаси ва дастурини маънавийят ва маърифат масалалари бўйича проректор (*маънавий-маърифий ишлар бўйича директор ўринбосари*) тасдиқлайди ва уларнинг фаолиятини мувофиқлаштиради, йўналтиради ҳамда бошқаради.

36. Педагог-тарбиячилар ўз фаолиятини «Талабалар турар жойи педагог-тарбиячиларининг йўриқномаси» асосида амалга оширади.

37. Педагог-тарбиячининг вазифалари:

- ТТЖдаги маънавий-маърифий ишлар бўйича йиллик режа тузади ва маънавий-маърифий ишлар бўйича проректор томонидан тасдиқланади;
- ТТЖдаги талабаларни қийнаётган муаммолар ва уларни қизиқтирган масалалар хусусида давра суҳбатлари ўтказиши, қизиқарли мавзуларда баҳс-мунозара ва дебатлар, маънавий-маърифий мавзудаги кечалар ташкил этади.
- ишлаб чиқилган режа асосида гуруҳ мураббийларининг турар жойга ташрифини ташкил этади;
- талабаларнинг яшаш шароитлари ва уларнинг дарс билан боғлиқ муаммолари ҳақида тушунчалар ҳамда йўл-йўриқлар кўрсатади;
- талабанинг одоб-ахлоқи, ўзини тутиши ва кийиниш маданиятига қай даражада эътибор қилаётганини назорат қилади;
- тегишли режа асосида “Кафедра кунлари”ни ташкил этади;
- талабалар кенгаши ишини ташкил этиш ва масъулиятини оширишга кўмаклашади (*зарурат тугилганда талабалар хулқ-атворини талабалар кенгаши муҳокамасига қўяди*);
- каватлар ва хоналар озодалигини, кават жиҳозлари соз ёки носозлигини

назорат қилади, мавжуд муаммоларни талабалар турар жойи мудир ва университет раҳбарияти эътиборига ҳавола этади;

- “Намунали хона” кўригини ўтказиб, ғолиб хона эгаларини рағбатлантириш ва талабаларнинг ижтимоий аҳволини яхшилашга доир таклифлар киритади;

- ТТЖда паспорт ва кириш-чиқиш тизими, шунингдек, ёнғин хавфсизлигини таъминлаш бўйича хона жиҳозларидан оқилона фойдаланиш борасида тушунтириш ишларини олиб боради;

- ТТЖда жорий этилган тартиб-интизом ва қоидаларни қўпол равишда бузиб, ахлоқ-одоб қоидаларига зид иш қилган талабаларни муҳокама қилиш, уларни талабалар турар жойидан четлатиш бўйича талабалар турар жойи маъмурияти ва факультет деканлари, проректорларга маълумотлар киритади;

- ТТЖдаги маданий дам олиш хоналарида маънавий-маърифий ишлар режасига биноан, давлатимиз, халқимиз байрамлари ва тантанали саналарга бағишлаб кўзга кўринган жамоат арбоблари, олимлар, ёзувчилар, шоирлар ва санъат арбоблари билан учрашувлар, суҳбатлар ва савол-жавоб кечаларини ўтказишда фаол иштирок этади, университет Маънавий-маърифий ишлар ва иқтидорли ёшлар билан ишлаш бўлими билан келишган ҳолда талабаларнинг музейлар, театрлар ва кўргазмаларга ташрифини ташкил қилади;

- ТТЖни замонавий дизайн талабалари асосида жиҳозлаш, керакли шиорлар, расмлар ва деворий лавҳалар қўйиш учун таклифлар беради;

- талабаларнинг ҳуқуқий онгини ошириш, қонунларга риоя қилиш ва ҳуқуқбузарликнинг олдини олиш мақсадида йилнинг ҳар чорагида ҳуқуқ-тартибот органлари – прокуратура, суд ва ички ишлар ходимларининг ТТЖдаги талабалар билан учрашувларини юқори савияда ўтказилишини таъминлайди;

- талабаларни университет ҳаёти, бой тарихий анъаналари, жамоат ташкилотлари фаолияти, шунингдек, бўлажак мутахассислар сифатида қўйилган талаблар билан таништириб боради;

- ТТЖда ёшовчи талабаларнинг маълумотлар базасини шакллантиради;

- ТТЖда истиқомат қилаётган талабаларнинг ота-оналари билан мунтазам алоқада бўлиб, уларнинг сўровлари асосида фарзандларининг умумий аҳволи ва таълим-тарбияси ҳақида маълумот беради;

- турдош таълим муассасаларидаги тажрибали тарбиячи-педагоглар билан яқиндан алоқада бўлиб, улар билан мунтазам тажриба алмашиб боради;

- шунингдек, ТТЖда талабаларнинг дарсдан ташқари вақтлардаги фаолияти тизимини такомиллаштириш, ёшлар билан олиб борилаётган тарбиявий ишларнинг таъсирчанлигини таъминлаш, талабаларни ижтимоий фойдали ишлар, қизиқарли тадбирлар билан қамраб олиш, уларнинг маданий дам олишларини ташкил этиш, фанларни ўзлаштириш ва дарс тайёрлаш шарт-шароитларини яхшилаш, талабалар турар жойига кириш ва чиқиш тартибларига қатъий риоя қилинишини таъминлаш, турли ёт ғояларнинг мақсад ва интилишларидан огоҳ этиш, гиёҳвандлик, ОИТС ва бошқа иллатлардан сақлаш каби тарбиявий ишларни амалга оширади.



## **VIII. Талабалар турар жойида талабаларнинг ўзини-ўзи бошқарувини ташкил этиш**

38. Талабалар турар жойида талабаларнинг ўзини-ўзи бошқарувини шакллантириш ва амалга ошириш мақсадида «Талабалар кенгаши» (кейинги ўринларда «Кенгаш») ташкил этилади.

39. Кенгаш таркиби умумий овоз бериш орқали, Талабалар томонидан сайланади. Талабалар бошқаруви аъзолари «яхши» ва «аъло» баҳоларга ўқийдиган, Талабалар ҳаётини ҳар томонлама яхши биладиган, мустақил фикрловчи ҳамда жамоат ишларида фаол иштирок этувчи шахслар бўлиши лозим.

40. Талабаларнинг ўзини-ўзи бошқаруви демократик асосларга қурилади. Кенгашнинг фаолиятини йўналтириш, мувофиқлаштириш ишларини педагог тарбиячилар амалга оширади.

41. Кенгаш раиси бир йил муддатга сайланади.

42. Кенгашнинг иш режаси ва дастури кенгаш раиси томонидан ишлаб чиқилиб, бошқарув аъзолари, педагог–тарбиячилар билан муҳокама қилинади ҳамда ўрнатилган тартибда ректор (директор) томонидан тасдиқланади.

43. Ҳар бир бўлинма ва қаватда сардорлар сайланади. Сардорлар яшовчиларнинг хона(секция)даги мулкни, тозалик ва тартиб-интизомни сақлашини назорат қилади. Сардорлар Кенгаш қарорларига асосланган ҳолда фаолият олиб боради.

44. Кенгаш ўз фаолиятини «Талабалар кенгаши» ҳақидаги Низом асосида ташкил этади ва олиб боради.

45. қуйидаги масалалар Кенгаш билан келишилган ҳолда ҳал этилади:

- маъмурият томонидан яшовчининг бир хонадан иккинчи хонага кўчирилиши;

- яшовчиларни рағбатлантириш ёки интизомий чоралар кўриш.

## **IX. Талабалар турар жойларида тарбиявий ишлар**

46. Талабалар турар жойида тарбиявий ишлар университет фаолиятининг устувор таркибий қисми саналиб, ректор раҳбарлигида тегишли бўлимлар, жамоат ташкилотлари ҳамкорлигида амалга оширилади.

47. Талабалар турар жойида тарбиявий ишларни амалга оширишда шахсан маънавий-ахлоқий тарбия ишлари бўйича проректор масъул саналади. У Талабалар турар жойи маъмурияти, деканатлар, кафедралар ҳамда профессор-ўқитувчилар таркиби ва касаба уюшмаси билан ҳамкорликда тарбиявий ишларни бошқаради.

48. Талабалар турар жойида амалга ошириладиган тарбиявий ишлар университетнинг махсус ишлаб чиқилган режаси асосида турли давлат ва жамоат ташкилотларини жалб қилган ҳолда олиб борилади.

Талабалар турар жойларида бадиий ва техник ижодий ҳаваскор тўғараклар, спорт ва туристик секциялар ҳамда қизиқишлар бўйича клублар, шунингдек, фан, санъат, адабиёт намояндалари билан учрашувлар, диспутлар, тематик кечалар ва байрам тадбирлари ташкил этилади.

## **X. Талабалар турар жойида яшовчиларга кўрсатиладиган хизматлар**

49. Талабалар турар жойида вақтинча фойдаланилмай турган хоналарда ўрнатилган тартибда турли хил (пуллик) хизматлари ташкил этилиши мумкин.

50. Талабалар турар жойида қуйидаги хоналар фаолияти йўлга қўйилади:

- маънавият ва маърифат хонаси; ўқув ва дарс тайёрлаш хонаси; кутубхона; дам олиш хонаси (ота-оналар хонаси); гигиена хонаси; ювенил хонаси; буюмларни сақлаш хонаси; ошхона; спорт зали ва бошқалар.

## **XI. Талабалар турар жойлари ҳолатини назорат қилиш**

51. Талабалар турар жойлари ҳолати университет раҳбарияти ва жамоат ташкилотлари томонидан махсус режа асосида ўрганиб борилади ҳамда унинг натижалари Илмий кенгашда муҳокама этилади.

52. Талабалар турар жойлари фаолияти университетнинг тегишли проректорлари томонидан доимий назорат этиб борилади ва ўз йўналиши бўйича вазифаларни амалга ошириш юзасидан ректорга таклифлар киритади.

53. Ҳар бир Талабалар турар жойида билдирилган мулоҳаза ва фикрларини ёзиш учун қайднома дафтари (1 нусха, муҳрланган) бўлиши лозим.

54. Талабалар турар жойларида «Адолат кутиси» ташкил этилади ва яшовчилар томонидан билдирилган фикр-мулоҳазалар ҳар ҳафтада бир марта ўрганилиб, муҳокама қилинади ҳамда тегишли чора-тадбирлар амалга оширилади.

## **XII. Талабалар турар жойларини молиялаштириш**

55. Талабалар турар жойи университетга ажратилган маблағ, бюджет, бюджетдан ташқари (тўлов-контракт) тушадиган, тадбиркорлик асосида ишлаб топилган ҳамда талаба ва аспирантлар истиқомат қилишлари учун тўланадиган маблағлар ҳисобидан молиялаштирилади.

56. Талабалар турар жойи штат бирликлари амалдаги университетнинг штат бирликлари асосида белгиланади.

## **XIII. Низомга ўзгартириш, қўшимчалар киритиш ва бекор қилиш**

57. Ушбу Низомга ўзгартириш ва қўшимчалар киритиш, шунингдек кучини йўқотган деб топиш университет кенгаши қарори ёки университет ректори буйруғи билан амалга оширилади.